

Namminersorlutik Oqartussat ingerlatseqatigiiffiutaanni aamma tamakku ataanni ingerlatseqatigiiffinni siulersuisuni ilaasortat akissarsiaqartinneqalernissaanut politikkip kaajallaasitanngortinneratigut pisortatigoortunngortinneqarnissaa pillugu Inatsisartut aalajangiiffigisassaattut siunnersuut.

(Naalakkersuisut Siulittaasuat)

Akissuteqaat

(Naalakkersuisut Siulittaasuat)

Aappassaaneerinnineq

Naalakkersuisut akissarsiaritinneqartunut politikiaata pisariillisarnissaa pillugu aalajangiiffigisassatut siunnersuummut Aningaasaqarnermut Akileraartarnermullu Ataatsimiititaliaata isumaliutissiissutaanut tunniunneqartumut Naalakkersuisut qujaniarput. Naalakkersuisut Aningaasaqarnermut Akileraartarnermullu Ataatsimiititaliap sulilluarsimaneranut ataqqinnipput, isumaliutissiissummimi isummersornerit arlallit suliarineqarput aktiaateqarluni ingerlatseqatigiiffinni Namminersorlutik Oqartussanit pigineqartuni taakkualu ataaniittuni akissarsiarineqartunut politikip pisariillisarnissaanni sulinermi suliarisariaqarmata. Tamanna Naalakkersuisut tusaatissatut tiguaat, akissarsianullu politikip pisariillisarnissaani suleriaqqinnissaminni ataatsimiititaliamit oqaaseqaatigineqartut akuersaarneqarnissaat ilungersuutiginiarlugu, aamma erseqqissaatigineqartunut tunngatillugu.

Ataatsimiititaliap maluginiarsimavaa kaajallaasitami § 3, imm. 5-mut missingiummi oqaaseqatigiit "Akissarsiat qaffasissusiat Aningaasaqarnermut Naalakkersuisoqarfimmi ukiut tallimakkaarlugit akinik aalajangersaanermut najoqqutassat naapertorlugit nalimmassarneqartassapput, siullermik 1. januar 2021." oqaasertamikkut eqqortuunngitsut, taamaammallu ataatsimiititaliaq oqaaseqatigiinnik nutaanik ukuninnga siunnersuuteqarluni: "§ 3, imm. 5. Akissarsiat qaffasissusaat Naatsorsueqqissaartarfiup akinut nalimmassaasarnermut kisitsisaatai malillugit nioqqutissanut sullissinernullu tamanut ukiut tallimakkaarlugit nalimmassarneqartassapput, siullermik 1. januar 2021." Tamanna Naalakkersuisut akuersaarpaat, kaajallaasitallu atortuulersinniarnani § 3, imm. 5-p allannngortinnissaa qulakkeerniarlugu. Tassungalu atatillugu Naalakkersuisut paasissutissiissutigissavaat kaajallaasitap atortuulersinnginnerani akissarsiani akigititat assigiinngitsut misissuiffigineqassammata, tamannalu aqutigalugu iluarsiinissat pisariaqartinneqartut qulakkeerniarlugit kiisalu aalajangersimasumik akinut naatsorsuisarnermi noqqutassaq naapertorlugu akissarsianut akigititat iluarsiiiffigalugit.

Naalakkersuisut aalajangiiffigisassatut siunnersuutaannut ataatsimiititaliamit apeqqutigineqartunut tunngatillugu, *tassani makku allaaserineqarlutik; "...Siulersuisut akissarsiaqartinnerisa qajannaatsumik misissuiffiginissaannut periuserineqartumut ilassutissat atorneqarsinnaasumik Naalakkersuisut suleriaqqinnissaanni..."* paasissutissiissutigineqassaaq akissarsianut akigititanik misissuilluni suliamik aallartitsinermi

kiisalu kaajallaasitamik suliaqarnermi Nunani Avannarlerni ingerlatseqatigiiffinni naalagaaffinnit pigineqartuni siulersuisut akissarsiaqartinnerinut qaammarsaanermik annertuumik suliaqartoqarsimammat. Taamatut misissueqqissaarluni sulineq periutsimut taaneqartumut Naalakkersuisut akissarsianut politikianut kaajallaasitanngortussap suliarinerata misissornissaanut atorneqarsimasunut tunngaviliissaaq.

Naalakkersuisut piginnittuunermut politikeqarneq nutaaq pilersinniarlugu suliaqartoqarsimaneranut ataatsimiititaliap soqutiginninneranut qujaniarput. Nalunaarutigineqassaaq piginnittuunermut politikissaq nutaaq pilersinniarlugu suliaqarneq maanna naamassingajalermat, tassanilu tusarniaareernikkut tusarniaanermut akissutit takkuttut suliarineqarsimammata iluarsisassallu kingullit ilanngunneqarsimammata. Naalakkersuisuni piginnittuunermut politikissamut nutaamut missingiut piaartumik suliarineqarnissaa kissaataavoq, taamaaliornikkut politikissaq nutaaq Naalakkersuisut akissarsianut politikianut kaajallaasitap atortussanngortinnissaanut atatillugu 2021-p aallartinnerani piviusunngortinneqarsinnaassammat.

Inatsisartut Suleriaasianni § 33, imm. 1 aallaavigalugu, tassani aalajangiiffigisassatut siunnersuutit piviusunngortinneranni aningaasaqarnikkut allaffissornikkullu kingunerisassat siunnersuummut tunngavilersuutini nassuiarneqassasut, pingaarnertigut nalunaarutigineqassaaq Inatsisartut aalajangiiffigisassatut siunnersuutaanni tassani nunatta karsianut aningaasaqarnikkut allaffissornikkullu toqqaannartumik kinnguneqarnaviangimmat.

Tamannalu pisariaqarpoq aktiaateqarluni ingerlatseqatigiiffinni Namminersorlutik Oqartussanit pigineqartuni siulersuisut ataasiakkaat akissarsiaqartinnerannut aningaasartuutit ingerlatseqatigiiffinnit ataasiakkaanit akilernerqartussaammata kiisalu aalajangiiffigisassatut siunnersuutip matuma suliarinerani allaffissornikkut sulineq aamma Naalakkersuisut akissarsianut politikianut kaajallaasitap atortussanngortinnera massakkut Naalakkersuisut Siulittaasuata Naalakkersuisoqarfianut aningaasaliissutaasunut ilaammata.

Aktiaateqarluni ingerlatseqatigiiffinni Namminersorlutik Oqartussanit pigineqartuni siulersuisut ataasiakkaat akissarsiaqartinnerat naapertorlugu paasissutissiissutigineqassaaq Naalakkersuisut akissarsianut politikeqarnerat atuuttoq tunngavigalugu ingerlatseqatigiiffinni ataasiakkaani siulersuisunut akissarsiaritinneqartut tamarmiusut 275.000 kr.-nit aamma 2.200.000 kr.-nit akornanniimmata, ingerlatseqatigiiffinnilu Namminersorlutik Oqartussanit pigineqartuni tamani akissarsiaritinneqartut tamarmiusut ukiumut 13.800.000 kr.-nit missaanniillutik, tassani siulersuisuni ilaasortat sulisunit toqqarneqartut ilanngullugit. Inatsisartut aalajangiiffigisassaattut siunnersuutaata matuma akuersissutigineratigut Naalakkersuisut akissarsianut politikianut kaajallaasitaq aallaavigalugu Naatsorsueqqissaartarfiup akinut iluarsiiissutinut kisitsisaatai 1. januar 2021-meersut naapertorlugit ukiunut tallimanut atuuttussamik akissarsianut akigitat pioreersut Naalakkersuitut iluarsiiiffiniarpaat.

Naalakkersuisut aalajangiiffigisassatut siunnersuutip saqqummiunneqartup Inatsisartuni aappassaaneerneqarnissaanut qilanaarmata Naalakkersuisut aalajangiiffigisassatut

siunnersuummut saqqummiunneqartumut imaluunniit Aningaasaqarnermut
Akileraartarnermullu Ataatsimiititaliap oqaaseqaataanut allanik oqaaseqaatissaqanngillat.